

『神農本草經』

底本：『神農本草經』江戶・嘉永七年、森立之校正本

- 玉泉。一名玉札。味甘平。生山谷。治五藏百病。柔筋強骨。安魂魄。長肌肉。益氣。久服耐寒暑。不飢渴。不老神仙。人臨死服五斤。死三年色不變。
- 丹沙。味甘微寒。生山谷。治身體五藏百病。養精神。安魂魄。益氣明目。殺精魅邪惡鬼※。久服通神明不老。能化爲汞。
- 水銀。味辛寒。生平土。治疥癩痂瘍白禿。殺皮膚中蟲蝨。墮胎。除熱。殺金銀銅錫毒。鎔化還復爲丹。久服神仙不死。
- 空青。味甘寒。生山谷。治青盲耳聾。明目。利九竅。通血脉。養精神。久服輕身延年不老。能化銅鐵鉛錫作金。
- 曾青。味酸小寒。生山谷。治目痛止淚出。風痺。利關節。通九竅。破癥堅積聚。久服輕身不老。能化金銅。
- 白青。味甘平。生山谷。明目利九竅。耳聾。心下邪氣。令人吐。殺諸毒三蟲。久服通神明。輕身延年不老。
- 扁青。味甘平。生山谷。治目痛明目。折跌癰腫。金創不瘳。破積聚。解毒氣。利精神。久服輕身不老。
- 石膽。一名畢石。味酸寒。生山谷。明目。目痛。金創諸癰瘡。女子陰蝕痛。石淋寒熱。崩中下血。諸邪毒氣。令人有子。鍊餌服之不老。久服增壽神仙。能化鐵爲銅。成金銀。
- 雲母。一名雲珠。一名雲華。一名雲英。一名雲液。一名雲沙。一名磷石。味甘平。生山谷。治身皮死肌。中風寒熱如在車船上。除邪氣。安五藏。益子精。明目。久服輕身延年。
- 朴消。味苦寒。生山谷。治百病。除寒熱邪氣。逐六府積聚。結固留癖。能化七十二種石。鍊餌服之。輕身神仙。
- 消石。一名芒消。味苦寒。生山谷。治五藏積熱。胃脹閉。滌去蓄結飲食。推陳致新。除邪氣。鍊之如膏。久服輕身。
- 熒石。一名羽串。味酸寒。生山谷。治寒熱泄利。白沃陰蝕。惡瘡目痛。堅骨齒。鍊餌服之。輕身不老增年。
- 滑石。味甘寒。生山谷。治身熱泄瀉。女子乳難。癰閉。利小便。蕩胃中積聚寒熱。益精氣。久服輕身耐飢長年。
- 紫石英。味甘溫。生山谷。治心腹欬逆邪氣。補不足。女子風寒在子宮。絕孕十年無子。久服溫中輕身延年。
- 白石英。味甘微溫。生山谷。治消渴。陰萎不足。欬逆。胸膈間久寒。益氣。除風濕痺。久服輕身長年。
- 青石赤石黃石白石黑石脂等。味甘平。生山谷。黃疸。泄利腸澀膿血。陰蝕下血赤白邪氣。癰腫疽痔惡瘡。頭瘍疥癩。久服補髓益氣。肥健不飢。輕身延年。五石脂各隨五色補五藏。
- 大一禹餘糧。一名石腦。味甘平。生山谷。治欬逆上氣。癥瘕血閉漏下。除邪氣。久服耐寒暑不飢。輕身飛行千里神仙。
- 禹餘糧。味甘寒。生池澤。治欬逆寒熱煩滿。下利赤白。血閉癥瘕大熱。鍊餌服之。不飢輕身延年。
- 青芝。一名龍芝。味酸平。生山谷。明目。補肝氣。安精魂。仁恕。久食輕身不老。延年神仙。

- 赤芝。一名丹芝。味苦平。生山谷。治胸中結。益心氣。補中。增智慧。不忘。久食輕身不老。延年神仙。
- 黃芝。一名金芝。味甘平。生山谷。治心腹五邪。益脾氣。安神。忠信和樂。久食輕身不老。延年神仙。
- 白芝。一名玉芝。味辛平。生山谷。治欬逆上氣。益肺氣。通利口鼻。強志意勇悍。安魄。久食輕身不老。延年神仙。
- 黑芝。一名玄芝。味鹹平。生山谷。治癰。利水道。益腎氣。通九竅。聰察。久食輕身不老。延年神仙。
- 紫芝。一名木芝。味甘溫。生山谷。治耳聾。利關節。保神。益精氣。堅筋骨。好顏色。久服輕身不老。延年神仙。
- 赤箭。一名離母。一名鬼督郵。味辛溫。生川谷。殺鬼精物。治蠱毒惡氣。久服益氣力。長陰肥健。輕身增年。
- 伏苓。一名伏菟※。味甘平。生山谷。治胸脇逆氣。憂恚驚邪恐悸。心下結痛。寒熱煩滿欬逆。止口焦舌乾。利小便。久服安魂魄。養神。不飢延年。
- 松脂。一名松膏。一名松肪。味苦溫。生山谷。治癰疽惡瘡。頭瘍白禿。疥癩風氣。安五藏。除熱。久服輕身不老延年。
- 柏實。味甘平。生山谷。治驚悸。安五藏。益氣。除風濕痺。久服令人潤澤美色。耳目聰明。不飢不老。輕身延年。
- 箇桂。味辛溫。生山谷。治百病※。養精神。和顏色。爲諸藥先娉通使。久服輕身不老。面生光華。媚好常如童子。
- 牡桂。味辛溫。生山谷。治上氣欬逆。結氣。喉痺吐吸。利關節。補中益氣。久服通神。輕身不老。
- 天門冬。一名顛勒。味苦平。生山谷。治諸暴風濕偏痺。強骨髓。殺三蟲。去伏尸。久服輕身益氣延年。
- 麥門冬。味甘平。生川谷。治心腹結氣。傷中傷飽。胃絡脉絕。羸瘦短氣。久服輕身不老不飢。
- 朮。一名山薊。味苦溫。生山谷。治風寒濕痺死肌。瘰。疽。止汗除熱。消食。作煎餌。久服輕身延年不飢。
- 女萎。味甘平。生川谷。治中風暴熱不能動搖。跌筋結肉。諸不足。去面黑奸※。好顏色潤澤。久服輕身不老。
- 乾地黄。一名地髓。味甘寒。生川澤。治折跌絕筋傷中。逐血痺。填骨髓。長肌肉。作湯。除寒熱積聚。除痺。生者尤良。久服輕身不老。
- 昌蒲。一名昌陽。味辛溫。生池澤。治風寒濕痺。欬逆上氣。開心孔。補五藏。通九竅。明耳目。出音聲。久服輕身。不忘。不迷惑。延年。
- 遠志。一名棘菟。一名要繞。一名細草。味苦溫。生川谷。治欬逆傷中。補不足。除邪氣。利九竅。益智慧。耳目聰明。不忘。強志倍力。久服輕身不老。葉名小草。
- 澤舄。一名水舄。一名芒芋。一名鵠瀉。味甘寒。生池澤。治風寒濕痺。乳難。消水。養五藏。益氣力。肥健。久服耳目聰明。不飢延年輕身。面生光。能行水上。
- 署豫。一名山芋。味甘溫。生山谷。治傷中。補虛羸。除寒熱邪氣。補中益氣力。長肌肉。久服耳目聰明。輕身不飢延年。
- 菊華。一名節華。味苦平。生川澤。治風頭。頭眩腫痛。目欲脫。淚出。皮膚死肌。惡風濕痺。久服利血氣。輕身耐老延年。

- 甘草。味甘平。生川谷。治五藏六府寒熱邪氣。堅筋骨。長肌肉倍力。金創。瘡。解毒。久服輕身延年。
- 人參。一名人衙。一名鬼蓋。味甘微寒。生山谷。補五藏。安精神。定魂魄。止驚悸。除邪氣。明目。開心益智。久服輕身延年。
- 石斛。一名林蘭。味甘平。生山谷。治傷中。除痺下氣。補五藏。虛勞羸瘦。強陰。久服厚腸胃。輕身延年。
- 石龍芮。一名魯果能。一名地樵。味苦平。生川澤。治風寒濕痺。心腹邪氣。利關節。止煩滿。久服輕身明目不死。
- 石龍蕒。一名龍須。一名續斷。一名龍朱※。味苦微寒。生山谷。治心腹邪氣。小便不利。淋閉。風濕鬼注惡毒。久服補虛羸。輕身耳目聰明延年。
- 落石。一名石鱧。味苦溫。生川谷。治風熱死肌。癰傷。口乾舌焦。癰腫不消。喉舌腫水漿不下。久服輕身明目。潤澤好顏色。不老延年。
- 王不留行。味苦平。生山谷。治金創。止血逐痛。出刺。除風痺內寒。久服輕身耐老增壽。
- 藍實。味苦寒。生平澤。解諸毒。殺蟲蚊注鬼螫毒。久服頭不白輕身。
- 景天。一名戒火。一名慎火。味苦平。生川谷。治大熱火瘡。身熱煩。邪惡氣。華。治女人漏下赤白。輕身明目。
- 龍膽。一名陵游。味苦寒。生山谷。治骨間寒熱。驚癇邪氣。續絕傷。定五藏。殺蟲毒。久服益智不忘。輕身耐老。
- 牛膝。一名百倍。味苦平。生川谷。治寒濕痿痺。四肢拘攣。膝痛不可屈伸。逐血氣。傷熱火爛※。墮胎。久服輕身耐老。
- 杜仲。一名思仙。味辛平。生山谷。治腰脊痛。補中。益精氣。堅筋骨。強志。除陰下痒濕。小便餘瀝。久服輕身耐老。
- 乾漆。味辛溫。無毒。生川谷。治絕傷。補中。續筋骨。填髓腦。安五藏。五緩六急。風寒濕痺。生漆。去長蟲。久服輕身耐老。
- 卷柏。一名萬歲。味辛溫。生山谷。治五藏邪氣。女子陰中寒熱痛。癥瘕血閉絕子。久服輕身。和顏色。
- 細辛。一名小辛。味辛溫。生山谷。治欬逆。頭痛腦動。百節拘攣。風濕痺痛死肌。明目。利九竅。久服輕身長年。
- 獨活。一名羌活。一名羌青。一名護羌使者。味苦平。生川谷。治風寒所擊。金創。止痛。賁豚癰瘰。女子疝瘕。久服輕身耐老。
- 升麻。一名周麻。味甘平。生山谷。解百毒。殺百精老物殃鬼。辟溫疫鄣邪蠱毒。久服不夭。輕身長年。
- 苽胡。一名地熏。味苦平。生川谷。治心腹去腸胃中結氣※。飲食積聚。寒熱邪氣。推陳致新。久服輕身。明目益精。
- 房葵。一名黎蓋。味辛寒。生川谷。治疝瘕腸泄。膀胱熱結溺不下。欬逆。溫瘡癩癰。驚邪狂走。久服堅骨髓。益氣輕身。
- 著實。味苦平。生山谷。治陰痿水腫。益氣。充肌膚。明目聰慧先知。久服不飢。不老輕身。
- 酸棗。味酸平。生川澤。治心腹寒熱邪結氣。四肢酸疼濕痺。久服安五藏。輕身延年。
- 槐實。味苦寒。生平澤。治五內邪氣熱。止涎唾。補絕傷。五痔火瘡。婦人乳瘕。子藏急痛。
- 枸杞。一名杞根。一名地骨。一名苟忌。一名地輔。味苦寒。生平澤。治五內邪氣。熱中消渴。周痺。久服堅筋骨。輕身耐老。
- 橘柚。一名橘皮。味辛溫。生川谷。治胸中瘕熱逆氣※。利水穀。久服去臭下氣。通神。

- 菴闍子。味苦微寒。生川谷。治五藏瘀血。腹中水氣。臃脹留熱。風寒濕痺。身體諸痛。久服輕身延年不老。
- 薏苡子。一名解蠱。味甘微寒。生平澤。治筋急拘攣不可屈伸。風濕痺。下氣。久服輕身益氣。其根下三蟲。
- 車前子。一名當道。味甘寒。生平澤。治氣癰。止痛。利水道小便。除濕痺。久服輕身耐老。
- 蛇牀子。一名蛇粟。一名蛇米。味苦平。生川谷。治婦人陰中腫痛。男子陰痿濕痒。除痺氣。利關節。癩癰惡瘡。久服輕身。
- 茵陳蒿。味苦平。治風濕寒熱邪氣。熱結黃疸。久服輕身益氣耐老。
- 漏蘆。一名野蘭。味苦寒。生山谷。治皮膚熱。惡瘡疽痔。濕痺。下乳汁。久服輕身益氣。耳目聰明。不老延年。
- 兔絲子。一名菟蘆。味辛平。生山谷。續絕傷。補不足。益氣力。肥健。汁。去面奸※。久服明目輕身延年。
- 白莫。一名穀菜。味甘寒。生山谷。治寒熱八疸消渴。補中益氣。久服輕身延年。
- 白蒿。味甘平。生川澤。治五藏邪氣。風寒濕痺。補中益氣。長毛髮令黑。療心懸。少食常飢。久服輕身耳目聰明不老。
- 肉縱容。味甘微溫。生山谷。治五勞七傷。補中。除莖中寒熱痛。養五藏。強陰。益精氣。多子。婦人癥瘕。久服輕身。
- 地膚子。一名地葵。味苦寒。生平澤。治膀胱熱。利小便。補中益精氣。久服耳目聰明。輕身耐老。
- 析蓂子。一名蔑荇。一名大藪。一名馬辛。味辛微溫。生川澤。明目。目痛淚出。除痺。補五藏。益精光。久服輕身不老。
- 茺蔚子。一名益母。一名益明。一名大札。味辛微溫。生池澤。明目益精。除水氣。久服輕身。莖。治隱軫痒※。可作浴湯。
- 木香。味辛溫。生山谷。治邪氣。辟毒疫溫鬼。強志。治淋露。久服不夢寤魘寐。
- 蒺藜子。一名旁通。一名屈人。一名止行。一名豺羽。一名升推。味苦溫。生平澤。治惡血。破癥結積聚。喉痺乳難。久服長肌肉。明目輕身。
- 天名精。一名麥句薑。一名蝦蟆藍。一名豕首。味甘寒。生川澤。治瘀血血痕欲死。下血。止血。利小便。除小蟲。去痺。除胸中結熱。止煩渴。久服輕身耐老。
- 蒲黃。味甘平。生池澤。治心腹膀胱寒熱。利小便。止血消瘀血。久服輕身。益氣力。延年神仙。
- 香蒲。一名雝。味甘平。生池澤。治五藏心下邪氣。口中爛草。堅齒。明目聰耳。久服輕身耐老。
- 蘭草。一名水香。味辛平。生池澤。利水道。殺蠱毒。辟不祥。久服益氣。輕身不老。通神明。
- 雲實。味辛溫。生川谷。治泄利腸澼。殺蟲蠱毒。去邪惡結氣。止痛。除寒熱。華。見鬼精物。多食令人狂走。久服輕身。通神明。
- 徐長卿。一名鬼督郵。味辛溫。生山谷。治鬼物百精蠱毒。疫疾邪惡氣。溫瘡。久服強悍輕身。
- 茜根。味苦寒。生山川※。治乾濕風痺。黃疸※。補中。
- 營實。一名牆薇。一名牆麻。一名牛棘。味酸溫。生川谷。治癰疽惡瘡。結肉跌筋。敗瘡熱氣。陰蝕不瘳。利關節。
- 旋華。一名筋根華。一名金沸。味甘溫。生平澤。益氣。去面奸黑色※。媚好。根※。治腹中寒熱邪氣。利小便。久服不飢輕身。
- 白兔藿。一名白葛。味苦平。生山谷。治蛇虺蜂蠆狗菜肉蠱毒。鬼注。
- 青囊。味甘寒。生川谷。治五藏邪氣。風寒濕痺。益氣。補腦髓。堅筋骨。久服耳目聰明。不飢不老增壽。巨勝苗也。

- 蔓荊實。味苦微寒。生山谷。治筋骨間寒熱濕痺拘攣。明目堅齒。利九竅。去白蟲。久服輕身耐老。小荊實亦等。
- 秦椒。味辛溫。生川谷。治風邪氣。溫中。除寒痺。堅齒長髮明目。久服輕身好顏色。耐老增年通神。
- 女貞實。味苦平。生川谷。補中安五藏※。養精神。除百疾。久服肥健輕身不老。
- 桑上寄生。一名寄屑。一名寓木。一名宛童。味苦平。生川谷。治腰痛。小兒背強。癰腫。安胎。充肌膚。堅髮齒。長鬚眉。其實。明目輕身通神。
- 蕤核。味甘溫。生川谷。治心腹邪結氣。明目。目痛赤傷淚出。久服輕身益氣不飢。
- 辛夷。一名辛矧。一名侯桃。一名房木。味辛溫。生川谷。治五藏身體寒熱※。風頭腦痛。面姁※。久服下氣。輕身明目。增年耐老。
- 木蘭。一名林蘭。味苦寒。生山谷。治身有大熱在皮膚中。去面熱赤炮酒皴。惡風癩疾。陰下痒濕。明目。
- 榆皮。一名零榆。味甘平。生山谷。治大小便不通。利水道。除邪氣。久服輕身不飢。其實尤良。
- 龍骨。味甘平。生川谷。治心腹鬼注。精物老魅。欬逆。泄利膿血。女子漏下。癥瘕堅結。小兒熱氣驚癇。龍齒。治小兒大人驚癇癡疾狂走。心下結氣。不能喘息。諸瘧。殺精物。久服輕身通神明延年。
- 牛黃。味苦平。生平澤。治驚癇寒熱。熱盛狂瘧。除邪逐鬼牛角瞬。下閉血。瘀血疼痛。女子帶下血。髓。補中填骨髓。久服增年。膽。可丸藥。
- 麝香。味辛溫。生川谷。辟惡氣。殺鬼精物。溫瘧蠱毒癰瘡。去三蟲。久服除邪。不夢寤魘寐。
- 髮髮。味苦溫。生平澤。治五癰關格不得小便。利水道。療小兒癰大人瘡※。仍自還神化。
- 熊脂。味甘微寒。生山谷。治風痺不仁筋急。五藏腹中積聚。寒熱羸瘦。頭瘍白禿。面姁炮。久服強志不飢輕身。
- 石蜜。一名石飴。味甘平。生山谷。治心腹邪氣。諸驚癇瘧。安五藏。諸不足。益氣補中。止痛解毒。除衆病。和百藥。久服強志輕身。不飢不老。
- 臘蜜※。味甘微溫。生山谷。治下利膿血。補中。續絕傷金創。益氣不飢耐老。
- 蜂子。一名蜚零。味甘平。生山谷。治風頭。除蠱毒。補虛羸傷中。久服令人光澤。好顏色不老。大黃蜂子。治心腹脹滿痛。輕身益氣。土蜂子。治癰腫。
- 白膠。一名鹿角膠。味甘平。治傷中勞絕。腰痛羸瘦。補中益氣。婦人血閉無子。止痛安胎。久服輕身延年。
- 阿膠。一名傅致膠。味甘平。出東阿。治心腹內崩。勞極洒洒如瘡狀。腰腹痛。四肢酸疼。女子下血。安胎。久服輕身益氣。
- 丹雄雞。味甘微溫。生平澤。治女人崩中漏下赤白沃※。補虛溫中。止血通神。殺毒辟不祥。頭。殺鬼。肪。治耳聾。雞腸。治遺溺。毗脰裏黃皮。治泄利。矢白。治消渴。傷寒寒熱。翮羽。下血閉。雞子。除熱火瘡。療癰瘡※。可作虎魄神物。雞白蠹。能肥賽。
- 鴈肪。一名鶩肪。味甘平。生池澤。治風擊拘急。偏枯。氣不通利。久服益氣不飢。輕身耐老。
- 牡蠣。一名蠣蛤。味鹹平。生池澤。治傷寒寒熱。溫瘧洒洒。驚恚怒氣。除拘緩鼠瘻。女子帶下赤白。久服強骨節。殺邪鬼。延年。
- 鯉魚膽。味苦寒。生池澤。治目熱赤痛。青盲。明目。久服強悍。益志氣。
- 鱻魚。一名鯛魚。味甘寒。生池澤。治濕痺面目浮腫。下大水。
- 蒲陶。味甘平。生山谷。治筋骨濕痺。益氣倍力強志。令人肥健。耐飢忍風寒。久食輕身不老。延年。可作酒。

- 蓬萊。一名覆盆。味酸平。生平澤。安五藏。益精氣。長陰令堅。強志倍力。有子。久服輕身不老。
- 大棗。味甘平。生平澤。治心腹邪氣。安中養脾。助十二經。平胃氣。通九竅。補少氣少津。身中不足。大驚。四肢重。和百藥。久服輕身長年。葉覆麻黃能出汗。
- 藕實莖。一名水芝丹。味甘平。生池澤。補中養神。益氣力。除百疾。久服輕身耐老。不飢延年。
- 雞頭實。一名鴈喙實。味甘平。生池澤。治濕痺腰脊膝痛。補中。除暴疾。益精氣。強志。耳目聰明。久服輕身不飢。耐老神仙。
- 白瓜子。一名水芝。味甘平。生平澤。令人悅澤。好顏色。益氣不飢。久服輕身耐老。
- 瓜蒂。味苦寒。生平澤。治大水身面四肢浮腫。下水。殺蠱毒。欬逆上氣。食諸果不消。病在胸腹中。皆吐下之。
- 冬葵子。味甘寒。治五藏六府。寒熱羸瘦。五癰。利小便。久服堅骨。長肌肉。輕身延年。
- 菟實。一名馬菟。味甘寒。生川澤。治青盲明目。除邪利大小便。去寒熱。久服益氣力。不飢輕身。
- 苦菜。一名茶草。一名選。味苦寒。生川谷。治五藏邪氣。厭穀胃痺。久服安心益氣。聰察少臥。輕身耐老。
- 胡麻。一名巨勝。味甘平。生川澤。治傷中虛羸。補五內。益氣力。長肌肉。填髓腦。久服輕身不老。葉名青囊。
- 麻蕒。一名麻勃。味辛平。生川谷。治七傷。利五藏。下血寒氣。多食令人見鬼狂走。久服通神明輕身。麻子。補中益氣。久服肥健不老。
- 雄黃。一名黃食石。味苦平。生山谷。治寒熱鼠瘻。惡瘡疽痔。死肌。殺精物惡鬼邪氣。百蟲毒腫。勝五兵。鍊食之輕身神仙。
- 雌黃。味辛平。生山谷。治惡瘡頭禿痂疥。殺毒蟲蝨。身痒。邪氣。諸毒※。鍊之久服輕身增年不老。
- 石鍾乳。味甘溫。生山谷。治欬逆上氣。明目益精。安五藏。通百節。利九竅。下乳汁。
- 殷孽。一名薑石。味辛溫。生山谷。治爛傷瘀血。泄利。寒熱鼠瘻。癥瘕結氣。
- 孔公孽。味辛溫。生山谷。治傷食不化。邪結氣。惡瘡疽瘻痔利九竅。下乳汁。
- 石流黃。味酸溫。生谷中。治婦人陰蝕。疽痔惡血。堅筋。頭禿。能化金銀銅鐵奇物。
- 凝水石。一名白水石。味辛寒。生山谷。治身熱。腹中積聚邪氣。皮中如火燒爛煩滿。水飲之。久服不飢。
- 石膏。味辛微寒。生山谷。治中風寒熱。心下逆氣驚喘。口乾舌焦不能息。腹中堅痛。除邪鬼。產乳金創。
- 陽起石。一名白石。味鹹微溫。生山谷。治崩中漏下。破子藏中血。癥瘕結氣。寒熱腹痛。無子。陰陽痿不合。補不足。
- 慈石。一名玄石。味辛寒。生川谷。治周痺風濕。肢節中痛不可持物。洗洗酸瘡。除大熱。煩滿及耳聾。
- 理石。一名立制石。味辛寒。生山谷。治身熱。利胃解煩。益精明目。破積聚。去三蟲。
- 長石。一名方石。味辛寒。生山谷。治身熱。四肢寒厥。利小便。通血脉。明目去翳眇。去三蟲。殺蠱毒。久服不飢。
- 膚青。味辛平。生川谷。治蠱毒。毒蛇菜肉諸毒。惡瘡。
- 鐵落。味辛平。生平澤。治風熱惡瘡。瘍疽瘡痂。疥氣在皮膚中。鐵。堅肌耐痛。鐵精。明目化銅。

- 當歸。一名乾歸。味甘溫。生川谷。治欬逆上氣。溫瘧寒熱洗洗在皮膚中。婦人漏下絕子。諸惡瘡瘍。金創。煮飲之。
- 防風。一名銅芸。味甘溫。生川澤。治大風頭眩痛。惡風風邪。目盲無所見。風行周身。骨節疼痺煩滿。久服輕身。
- 秦艽。味苦平。生山谷。治寒熱邪氣。寒濕風痺肢節痛。下水利小便。
- 黃耆。一名戴糝。味甘微溫。生山谷。治癰疽久敗瘡。排膿止痛。大風癩疾。五痔鼠瘻。補虛。小兒百病。
- 吳茱萸。一名藜。味辛溫。生川谷。溫中下氣止痛。欬逆寒熱。除濕血痺。逐風邪。開湊理。根。殺三蟲。
- 黃芩。一名腐腹。味苦平。生川谷。治諸熱黃疸。腸澼泄利。逐水下血閉。惡瘡疽蝕火瘍。
- 黃連。一名王連。味苦寒。生川谷。治熱氣。目痛眦傷泣出。明目。腸澼腹痛下利。婦人陰中腫痛。久服令人不忘。
- 五味。味酸溫。生山谷。益氣。欬逆上氣。勞傷羸瘦。補不足。強陰益男子精。
- 決明。味鹹平。生川澤。治青盲。目淫膚赤白膜。眼赤痛淚出。久服益精光輕身。
- 勺藥。味苦平。生川谷。治邪氣腹痛。除血痺。破堅積寒熱疝瘕。止痛。利小便。益氣。
- 桔梗。味辛微溫。生山谷。治胸脇痛如刀刺。腹滿腸鳴幽幽。驚恐悸氣。
- 乾薑。味辛溫。生川谷。治胸滿欬逆上氣。溫中止血出汗。逐風濕痺。腸澼下利。生者尤良。久服去臭氣。通神明。
- 芎藭。味辛溫。生川谷。治中風入腦頭痛。寒痺筋攣緩急※。金創。婦人血閉無子。
- 藁蕪。一名薇蕪。味辛溫。生川澤。治欬逆。定驚氣。辟邪惡。如蠱毒鬼注。去三蟲。久服通神。
- 藁本。一名鬼卿。一名地新。味辛溫。生山谷。治婦人疝瘕。陰中寒腫痛。腹中急。除風頭痛。長肌膚。悅顏色。
- 麻黃。一名龍沙。味苦溫。生川谷。治中風傷寒頭痛。溫瘧。發表出汗。去邪熱氣。止欬逆上氣。除寒熱。破癥堅積聚。
- 葛根。一名雞齊根。味甘平。生川谷。治消渴。身大熱。嘔吐諸痺。起陰氣。解諸毒。葛穀治下利十歲已上。
- 知母。一名蚺母※。一名連母。一名野蓼。一名地參。一名水參。一名水浚。一名貨母。一名蜚母。味苦寒。生川谷。治消渴熱中。除邪氣。肢體浮腫。下水。補不足益氣。
- 貝母。一名空草。味辛平。治傷寒煩熱。淋瀝邪氣疝瘕。喉痺乳難。金創風瘡。
- 栝樓。一名地樓。味苦寒。生川谷。治消渴。身熱煩滿。大熱。補虛安中。續絕傷。
- 丹參。一名郤蟬草。味苦微寒。生川谷。治心腹邪氣。腸鳴幽幽如走水。寒熱積聚。破癥除瘕。止煩滿。益氣。
- 龍眼。一名益智。味甘平。生山谷。治五藏邪氣。安志厭食。久服強魂魄。聰察。輕身不老。通神明。
- 厚朴。味苦溫。生山谷。治中風傷寒頭痛。寒熱驚氣。血痺死肌。去三蟲。
- 猪苓。一名豨猪矢。味甘平。生山谷。治痰瘧。解毒蠱注不祥。利水道。久服輕身耐老。
- 竹葉。味苦平。治欬逆上氣。溢筋惡瘍。殺小蟲。根。作湯。益氣止渴。補虛下氣。汁。治風瘧痺。實。通神明。輕身益氣。
- 枳實。味苦寒。生川澤。治大風在皮膚中如麻豆苦痒。除寒熱熱結。止利。長肌肉。利五藏。益氣輕身。
- 玄參。一名重臺。味苦微寒。生川谷。治腹中寒熱積聚。女子產乳餘疾。補腎氣。令人目明。
- 沙參。一名知母。味苦微寒。生川谷。治血積驚氣。除寒熱。補中益肺氣。久服利人。

- 苦參。一名水槐。一名苦珈。味苦寒。生山谷。治心腹結氣。癥瘕積聚。黃疸。溺有餘瀝。逐水。除癰腫。補中。明目止淚。
- 續斷。一名龍豆。一名屬折。味苦微溫。生山谷。治傷寒。補不足。金創癰傷折跌。續筋骨。婦人乳難。久服益氣力。
- 山茱萸。一名蜀棗。味酸平。生山谷。治心下邪氣寒熱。溫中。逐寒濕痺。去三蟲。久服輕身。
- 桑根白皮。味甘寒。生山谷。治傷中五勞六極羸瘦。崩中脈絕。補虛益氣。葉。除寒熱。出汗。桑耳。黑者。治女子漏下。赤白汁血病。癥瘕積聚腹痛。陰陽寒熱。無子。五木耳名櫛。益氣不飢。輕身強志。
- 松蘿。一名女蘿。味苦平。生川谷。治瞋怒邪氣。止虛汗出。頭風。女子陰寒腫痛。
- 白棘。一名棘鍼。味辛寒。生川谷。治心腹痛。癰腫。潰膿止痛。
- 狗脊。一名百枝。味苦平。生川谷。治腰背強。關節緩急。周痺寒濕膝痛。頗利老人。
- 萆薢。味苦平。生山谷。治腰背痛強。骨節風寒濕周痺。惡瘡不瘳。熱氣。
- 通草。一名附支。味辛平。生山谷。去惡蟲。除脾胃寒熱。通利九竅血脈關節。令人不忘。
- 石韋。一名石徇。味苦平。生山谷。治勞熱邪氣。五癰閉不通。利小便水道。
- 瞿麥。一名巨句麥。味苦寒。生川谷。治關格諸癰結。小便不通。出刺決癰腫。明目去翳。破胎墮子。下閉血。
- 敗醬。一名鹿腸。味苦平。生川谷。治暴熱火瘡。赤氣。疥癬疽痔。馬鞍熱氣。
- 秦皮。味苦微寒。生川谷。治風寒濕痺。洗洗寒氣。除熱。目中青翳白膜。久服頭不白輕身。
- 白芷。一名芳香。味辛溫。生川谷。治女人漏下赤白。血閉陰腫。寒熱。風頭侵目淚出。長肌膚潤澤。可作面脂。
- 杜若。一名杜衡※。味辛微溫。生川澤。治胸脇。下逆氣。溫中。風入腦戶。頭腫痛。多涕淚出。久服益精明目輕身。
- 蘘木。一名檀桓。味苦寒。生山谷。治五藏腸胃中結氣熱。黃疸腸痔。止泄利。女子漏下赤白。陰陽蝕瘡。
- 枝子。一名木丹。味苦寒。生川谷。治五內邪氣。胃中熱氣。面赤酒皸鼓鼻。白癩赤癩瘡瘍。
- 合歡。味甘平。生川谷。安五藏。和心志。令人歡樂無憂。久服輕身明目。得所欲。
- 衛矛。一名鬼箭。味苦寒。生山谷。治女子崩中下血。腹滿汗出。除邪。殺鬼毒蠱注。
- 紫葳。味酸微寒。生川谷。治婦人乳餘疾。崩中癥瘕血閉。寒熱羸瘦。養胎。
- 無夷。一名無姑。一名桎束。味辛平。生川谷。治五內邪氣。散皮膚骨節中淫淫行毒。去三蟲。化食。
- 紫草。一名紫丹。一名紫芙。味苦寒。生山谷。治心腹邪氣。五疸。補中益氣。利九竅。通水道。
- 紫菀。味苦溫。生山谷。治欬逆上氣。胸中寒熱結氣。去蠱毒痿蹶。安五藏。
- 白鮮。味苦寒。生川谷。治頭風黃疸。欬逆淋瀝。女子陰中腫痛。濕痺死肌。不可屈伸起止行步。
- 白薇。味苦平。生川谷。治暴中風身熱。肢滿。忽忽不知人。狂惑邪氣。寒熱酸疼。溫瘡洗洗發作有時。
- 薇銜。一名麋銜。味苦平。生川澤。治風濕痺。歷節痛。驚癇吐舌悸氣。賊風。鼠瘻癰腫。
- 泉耳。一名胡泉。一名地葵。味甘溫。生川谷※。治風頭寒痛。風濕周痺。四肢拘攣痛。惡肉死肌。久服益氣。耳目聰明。強志輕身。
- 茅根。一名蘭根。一名茄根。味甘寒。生山谷。治勞傷虛羸。補中益氣。除瘀血血閉寒熱。利小便。其苗。下水。
- 百合。味甘平。生川谷。治邪氣腹脹心痛。利大小便。補中益氣。
- 酸漿。一名酢漿。味酸平。生川澤。治熱煩滿。定志益氣。利水道。產難吞其實立產。



- 蠡實。一名劇草。一名三堅。一名豕首。味甘平。生川谷。治皮膚寒熱。胃中熱氣。風寒濕痺。堅筋骨。令人嗜食。久服輕身。華葉。去白蟲。
- 王孫。味苦平。生川谷。治五藏邪氣。寒濕痺。四肢疼酸。膝冷痛。
- 爵牀。味鹹寒。生川谷。治腰脊痛不得著牀。俛仰艱難。除熱。可作浴湯。
- 王瓜。一名土瓜。味苦寒。生平澤。治消渴內痺。瘀血月閉。寒熱酸疼。益氣愈聾。
- 馬先蒿。一名馬矢蒿。味苦平。生川澤。治寒熱鬼注。中風濕痺。女子帶下病。無子。
- 蜀羊泉。味苦微寒。生川谷。治頭禿惡瘡。熱氣疥癩。痂癬蟲。
- 積雪草。味苦寒。生川谷。治大熱。惡瘡癰疽。浸淫赤爛。皮膚赤。身熱。
- 水萍。一名水華。味辛寒。生池澤。治暴熱身痒。下水氣。勝酒。長鬚髮。止消渴。久服輕身。
- 海藻。一名落首。味苦寒。生池澤。治癭瘤氣。頸下核。破散結氣。癰腫。癥瘕堅氣。腹中上下鳴。下十二水腫。
- 假蘇。一名鼠莫。味辛溫。生川澤。治寒熱鼠瘻。瘰癧生瘡。結聚氣破散之。下瘀血。除濕痺。
- 犀角。味苦寒。生川谷。治百毒蠱注。邪鬼鄣氣。殺鉤吻鳩羽蛇毒。除邪。不迷惑魘寐。久服輕身。
- 零羊角。味鹹寒。生川谷。明目益氣起陰。去惡血注下。辟蠱毒惡鬼不祥。安心氣。常不魘寐。久服強筋骨輕身。
- 殺羊角。味鹹溫。生川谷。治青盲。明目。殺疥蟲。止寒泄。辟惡鬼虎狼※。止驚悸。久服安心。益氣力輕身。
- 白馬莖。味鹹平。生平澤。治傷中脉絕。陰不起。強志益氣。長肌肉。肥健生子。眼。治驚癇腹滿瘡疾。懸蹄。治驚癇瘰癧乳難。辟惡氣鬼毒。蠱注不祥。
- 牡狗陰莖。一名狗精。味鹹平。生平澤。治傷中。陰痿不起令強熱大。生子。除女子帶下十二疾。膽。明目。
- 鹿茸。味甘溫。治漏下惡血。寒熱驚癇。益氣強志。生齒不老。角。治惡瘡癰腫。逐邪惡氣。留血在陰中。
- 伏翼。一名蝙蝠。味鹹平。生川谷。治目瞑。明目。夜視有精光。久服令人喜樂媚好無憂。
- 蝟皮。味苦平。生川谷。治五痔陰蝕。下血赤白。五色血汗不止。陰腫痛引腰背。酒煮殺之。
- 石龍子。一名蜥蜴。味鹹寒。生川谷。治五癰邪結氣。破石淋。下血。利小便水道。
- 露蜂房。一名蜂場。味苦平。生山谷。治驚癇瘰癧。寒熱邪氣癰疾。鬼精蠱毒。腸痔。火熬之良。
- 樗雞。味苦平。生川谷。治心腹邪氣。陰痿。益精強志。生子好色。補中輕身。
- 蚱蟬。味鹹寒。生楊柳上。治小兒驚癇。夜啼。癰病寒熱。
- 白彊蠶。味鹹平。生平澤。治小兒驚癇。夜啼。去三蟲。滅黑奸※。令人面色好。男子陰瘍病。
- 木蟲。一名魂常。味苦平。生川澤。治目赤痛。皆傷淚出。瘀血血閉。寒熱酸輕。無子。
- 蜚蟲。味苦微寒。生川谷。逐瘀血。破下血積堅痞。癥瘕寒熱。通利血脉及九竅。
- 蜚廉。味鹹寒。生川澤。治血瘀癥堅寒熱。破積聚。喉咽痺。內寒無子。
- 桑螵蛸。一名蝨蛸。味鹹平。生桑枝上。治傷中。疝瘕陰痿。益精生子。女子血閉腰痛。通五淋。利小便水道。採蒸之。
- 蟪蟲。一名地鼈。味鹹寒。生川澤。治心腹寒熱洗洗。血積癥瘕。破堅下血閉。生子大良。
- 蟻螬。一名蟻螬。味鹹微溫。生平澤。治惡血血瘀。痺氣。破折血在脇下堅滿痛。月閉。目中淫膚。青翳白膜。
- 蛭螭。一名陵蠡。味鹹寒。生池澤。治賊風喎僻。軼筋及脫肛。驚癇攣縮。
- 水蛭。味鹹平。生池澤。治惡血瘀血月閉。破血瘕積聚。無子。利水道。
- 海蛤。一名魁蛤。味苦平。生池澤。治欬逆上氣。喘息煩滿。胸痛寒熱。文蛤。治惡瘡蝕五痔。

- 龜甲。一名神屋。味鹹平。生池澤。治漏下赤白。破癥瘕。痲瘡。五痔陰蝕。濕痺四肢重弱。小兒顛不合。久服輕身不飢。
- 鼈甲。味鹹平。生池澤。治心腹癥瘕。堅積寒熱。去痞息肉。陰蝕痔惡肉。
- 鱉甲※。味辛微溫。生池澤。治心腹癥瘕。伏堅。積聚寒熱。女子崩中下血五色。小腹陰中相引痛。瘡疥死肌。
- 烏賊魚骨。味鹹微溫。生池澤。治女子漏下。赤白經汁。血閉。陰蝕腫痛。寒熱癥瘕。無子。
- 蟹。味鹹寒。生池澤。治胸中邪氣※。熱結痛。喎僻面腫。敗漆燒之致鼠。
- 梅實。味酸平※。生川谷。下氣。除熱煩滿。安心。肢體痛。偏枯不仁死肌。去青黑誌惡疾。
- 蓼實。味辛溫。生川澤。明目溫中。耐風寒。下水氣。面目浮腫。癰瘍。馬蓼。去腸中蛭蟲。輕身。
- 葱實。味辛溫。生平澤。明目。補中不足。其莖中作浴湯。治傷寒寒熱。出汗。中風面目腫。癱。治金創創敗。輕身不飢耐老。
- 水蘇。味辛微溫。生池澤。下氣殺穀。除飲食。辟口臭。去毒。辟惡氣。久服通神明。輕身耐老。
- 大豆黃卷。味甘平。生平澤。治濕痺筋攣膝痛。生大豆。塗癰腫。煮飲汁殺鬼毒。止痛。赤小豆。下水。排癰腫膿血。
- 青琅玕。一名石珠。味辛平。生平澤。治身痒火瘡。癰傷疥瘡。死肌。
- 礬石。一名青分石。一名立制石。一名固羊石。味辛大熱。生山谷。治寒熱鼠瘻蝕瘡。死肌風痺。腹中堅邪氣。除熱。
- 代赭。一名須丸。味苦寒。生山谷。治鬼注賊風蠱毒。殺精物惡鬼。腹中毒邪氣。女子赤沃漏下。
- 鹵鹹。味苦寒。生池澤。治大熱消渴狂煩。除邪。及吐下蠱毒。柔肌膚。戒鹽。明目。目痛。益氣。堅肌骨。去毒蠱。大鹽。令人吐。
- 白惡。味苦溫。生山谷。治女子寒熱癥瘕。月閉積聚。陰腫痛。漏下無子。
- 鉛丹。味辛微寒。生平澤。治欬逆胃反。驚癇癲疾。除熱下氣。鍊化還成九光。久服通神明。
- 粉錫。一名解錫。味辛寒。生山谷。治伏尸毒螫。殺三蟲。錫鏡鼻。治女子血閉。癥瘕伏腸。絕孕。
- 石灰。一名惡灰。味辛溫。生山谷。治疽瘍疥瘡。熱氣惡瘡。癰疾死肌墮眉。殺痔蠱。去黑子息肉。
- 冬灰。一名藜灰。味辛微溫。生川澤。治黑子。去疣息肉。疽蝕疥瘡。
- 大黃。味苦寒。生山谷。下瘀血血閉。寒熱。破癥瘕積聚。留飲宿食。蕩滌腸胃。推陳致新。通利水穀。調中化食。安和五藏。
- 蜀椒。味辛溫。生川谷。治邪氣欬逆。溫中。逐骨節皮膚死肌。寒濕痺痛。下氣。久服之頭不白。輕身增年。
- 奔草。味辛溫。生山谷。治風頭。癰腫乳癰。疝瘕。除結氣。疥瘡蟲疽瘡。殺蟲魚。
- 郁核。一名爵李。味酸平。生川谷。治大腹水腫。面目四肢浮腫。利小便水道。根。治齒斷腫齩齒。堅齒。鼠李。治寒熱瘰癧瘡。
- 巴豆。一名巴椒。味辛溫。生川谷。治傷寒溫瘧寒熱。破癥瘕結堅積聚。留飲淡癖。大腹水脹。蕩練五藏六府。開通閉塞。利水穀道。去惡肉。除鬼蠱毒注邪物。殺蟲魚。
- 甘遂。一名主田。味苦寒。生川谷。治大腹疝瘕腹滿。面目浮腫。留飲宿食。破癥堅積聚。利水穀道。
- 亭歷。一名大室。一名大適。味辛寒。生平澤。治癥瘕積聚結氣。飲食寒熱。破堅逐邪。通利水道。
- 大戟。一名印鉅。味苦寒。治蠱毒十二水。腹滿急痛。積聚中風。皮膚疼痛。吐逆。

- 澤漆。味苦微寒。生川澤。治皮膚熱。大腹水氣。四肢面目浮腫。丈夫陰氣不足。
- 芫華。一名去水。味辛溫。生川谷。治欬逆上氣。喉鳴喘。咽腫短氣※。蠱毒鬼瘡。疔瘕癰腫。殺蟲魚。
- 蕘華。味苦寒。生川谷。治傷寒溫瘧。下十二水。破積聚大堅癥瘕。蕩滌腸胃中留癖飲食。寒熱邪氣。利水道。
- 旋覆華。一名金沸草。一名盛樵。味鹹溫。生川谷。治結氣。脇下滿。驚悸。除水。去五藏間寒熱。補中下氣。
- 鉤吻。一名野葛。味辛溫。生山谷。治金瘡乳癰。中惡風。欬逆上氣水腫。殺鬼注蠱毒。
- 狼毒。一名續毒。味辛平。生山谷。治欬逆上氣。破積聚飲食。寒熱水氣。惡瘡鼠瘻疽蝕。鬼精蠱毒。殺飛鳥走獸。
- 鬼臼。一名爵犀。一名馬目毒公。一名九臼。味辛溫。生山谷。殺蠱毒鬼注精物。辟惡氣不祥。逐邪解百毒。
- 篇蓄。味苦平。生山谷。治浸淫疥癩疽痔。殺三蟲。
- 商陸。一名埤根。一名夜呼。味辛平。生川谷。治水脹。疔瘕痺。熨除癰腫。殺鬼精物。
- 女青。一名雀瓢。味辛平。生山谷。治蠱毒。逐邪惡氣。殺鬼。溫瘧。辟不祥。
- 天雄。一名白幕。味辛溫。生山谷。治大風。寒濕痺。歷節痛。拘攣緩急。破積聚。邪氣金瘡。強筋骨。輕身健行。
- 烏頭。一名奚毒。一名即子。一名烏喙。味辛溫。生山谷。治中風惡風洗洗。出汗。除寒濕痺。欬逆上氣。破積聚寒熱。其汁煎之。名射罔。殺禽獸。
- 附子。味辛溫。生山谷。治風寒欬逆邪氣。溫中。金瘡。破癥堅積聚。血瘕寒濕。踠臂拘攣。膝痛不能行步。
- 羊躑躅。味辛溫。生川谷。治賊風在皮膚中淫淫痛。溫瘧惡毒。諸痺。
- 茵芋。味苦溫。生川谷。治五藏邪氣。心腹寒熱羸瘦。瘡狀發作有時。諸關節風濕痺痛。
- 射干。一名烏扇。一名烏蒲。味苦平。生川谷。治欬逆上氣。喉痺咽痛不得消息。散結氣。腹中邪逆。食飲大熱。
- 鳶尾。味苦平。生山谷。治蠱毒邪氣。鬼注諸毒。破癥瘕積聚。去水下三蟲。
- 皂莢。味辛溫。生川谷。治風痺死肌。邪氣風頭淚出。下水利九竅。殺鬼精物。
- 練實。味苦寒。生山谷。治溫疾傷寒。大熱煩狂。殺三蟲。疥瘍。利小便水道。
- 柳華。一名柳絮。味苦寒。生川澤。治風水。黃疸面熱黑。葉。治馬疥痂瘡。實。潰癰逐膿血。子汁。療渴。
- 桐葉。味苦寒。生山谷。治惡蝕瘡著陰。皮。治五痔。殺三蟲。華。傅猪瘡。肥大三倍。
- 梓白皮。味苦寒。生山谷。治熱。去三蟲。華葉。擣傅猪瘡。肥大易養三倍。
- 恆山。一名互草。味苦寒。生川谷。治傷寒寒熱。熱發溫瘧。鬼毒。胸中痰結。吐逆。
- 蜀漆。味辛平。生川谷。治瘧及欬逆寒熱。腹中癥堅。痞結積聚。邪氣蠱毒鬼注。
- 青葙。一名草蒿。一名萋蒿。味苦微寒。生平谷。治邪氣皮膚中熱。風瘙身痒。殺三蟲。子。名草決明。療唇口青。
- 半夏。一名地文。一名水玉。味辛平。生川谷。治傷寒寒熱。心下堅。下氣。喉咽腫痛。頭眩胸脹。欬逆腸鳴。止汗。
- 款冬。一名藁吾。一名顛東。一名虎須。一名菟奚。味辛溫。生山谷。治欬逆上氣。善喘喉痺。諸驚癇。寒熱邪氣。
- 牡丹。一名鹿韭。一名鼠姑。味辛寒。生山谷。治寒熱中風。瘕瘕瘕。驚癇邪氣。除癥堅瘀血留舍腸胃。安五藏。療癰瘡。

- 防已。一名解離。味辛平。生川谷。治風寒溫瘧熱氣。諸癰。除邪。利大小便。
- 巴戟天。味辛微溫。生山谷。治大風邪氣。陰痿不起。強筋骨。安五藏。補中增志益氣。
- 石南草。一名鬼目。味辛平。生山谷。養腎氣。內傷陰衰。利筋骨皮毛。實。殺蟲毒。破積聚。逐風痺。
- 女菀。味辛溫。生川谷。治風寒洗洗。霍亂泄利。腸鳴上下無常處。驚癰寒熱百疾。
- 地榆。味苦微寒。生山谷。治婦人乳癰痛。七傷帶下病。止痛。除惡肉。止汗療金創。
- 五加。一名豺漆。味辛溫。治心腹疝氣腹痛。益氣療臂。小兒不能行。疽瘡陰蝕。
- 澤蘭。一名虎蘭。一名龍棗。味苦微溫。生池澤。治乳婦內衄。中風餘疾。大腹水腫。身面四肢浮腫。骨節中水。金創。癰腫瘡膿血。
- 黃環。一名陵泉。一名大就。味苦平。生山谷。治蟲毒鬼注鬼魅。邪氣在藏中。除欬逆寒熱。
- 紫參。一名牡蒙。味苦寒。生山谷。治心腹積聚。寒熱邪氣。通九竅。利大小便。
- 藿菌。一名藿蘆。味鹹平。生池澤。治心痛。溫中。去長蟲。白跪。螻蟲蛇螫毒。癥瘕諸蟲。
- 連翹。一名異翹。一名蘭華。一名折根。一名軹。一名三廉。味苦平。生山谷。治寒熱鼠瘻。癰癧癰腫。惡瘡癭瘤。結熱蟲毒。
- 白頭公。一名野丈人。一名胡王使者。味苦溫無毒。生川谷。治溫瘧狂易。寒熱癥瘕積聚。癭氣。逐血止痛。療金創。
- 貫衆。一名貫節。一名貫渠。一名百頭。一名虎卷。一名扁苻。味苦微寒。生山谷。治腹中邪熱氣。諸毒。殺三蟲。
- 狼牙。一名牙子。味苦寒。生川谷。治邪氣熱氣。疥癩惡瘍瘡痔。去白蟲。
- 藜蘆。一名葱苒。味辛寒。生山谷。治蟲毒。欬逆。泄利腸澼。頭瘍疥癩惡瘡。殺諸蟲毒。去死肌。
- 閻茹。味辛寒。生川谷。蝕惡肉敗瘡※。死肌。殺疥蟲。排膿惡血。除大風熱氣。善忘不樂。
- 羊桃。一名鬼桃。一名羊腸。味苦寒。生川谷。治燹熱身暴赤色※。風水積聚。惡瘍。除小兒熱。
- 羊蹄。一名東方宿。一名連蟲陸。一名鬼目。味苦寒。生川澤。治頭禿疥癩。除熱。女子陰蝕。
- 鹿藿。味苦平。生山谷。治蟲毒。女子腰腹痛不樂。腸癰癩瘰癧瘡氣。
- 牛扁。味苦微寒。生川谷。治身皮膚熱氣。可作浴湯。殺牛蝨小蟲。又療牛病。
- 陸英。味苦寒。生川谷。治骨間諸痺。四肢拘攣疼酸。膝寒痛。陰萎。短氣不足。脚腫。
- 白斂。一名菟核。一名白草。味苦平。生山谷。治癰腫疽瘡。散結氣。止痛除熱。目中赤。小兒驚癰。溫瘧。女子陰中腫痛。
- 白及。一名甘根。一名連及草。味苦平。生川谷。治癰腫惡瘡敗疽。傷陰。死肌。胃中邪氣。賊風鬼擊。痲緩不收。
- 蛇全。一名蛇銜。味苦微寒。生山谷。治驚癰寒熱邪氣。除熱。金瘡。疽痔鼠瘻。惡瘡頭瘍。
- 草蒿。一名青蒿。一名方潰。味苦寒。生川澤※。治疥癩痲痒惡瘡。殺蝨。留熱在骨節間。明目。
- 雷丸。味苦寒。生山谷。殺三蟲。逐毒氣。胃中熱。利丈夫。不利女子。作膏摩小兒百病。
- 溲疏。味辛寒。生川谷。治身皮膚中熱。除邪氣。止遺溺。可作浴湯。
- 藥實根。一名連木。味辛溫。生山谷。治邪氣諸痺疼酸。續絕傷。補骨髓。
- 飛廉。一名飛輕。味苦平。生川澤。治骨節熱。脛重酸疼。久服令人身輕。
- 淫羊藿。一名剛前。味辛寒。生山谷。治陰痿。絕傷。莖中痛。利小便。益氣力強志。
- 虎掌。味苦溫。生山谷。治心痛。寒熱結氣。積聚伏梁。傷筋痿拘緩。利水道。
- 萆薢子。一名橫唐。味苦寒。生川谷。治齒痛。出蟲。肉痺拘急。使人健行見鬼。多食令人狂走。久服輕身。走及奔馬。強志益力通神。
- 欒華。味苦寒。生川谷。治目痛泣出傷眥。消目腫。

- 蔓椒。一名豕椒。味苦温。生川谷。治風寒濕痺。歷節疼痛。除四肢厥氣膝痛。
- 蓋草。味苦平。生川谷。治久欬上氣。喘逆久寒。驚悸。痂疥白禿瘍氣。殺皮膚小蟲。
- 夏枯草。一名夕句。一名乃東。味苦寒。生川谷。治寒熱瘰癧。鼠瘻頭瘡。破癥。散瘰結氣。脚腫濕痺。輕身。
- 烏韭。味甘寒。生山谷。治皮膚往來寒熱。利小腸膀胱氣。
- 蚤休。一名螫休。味苦微寒。生川谷。治驚癇搖頭弄舌。熱氣在腹中。癩疾。癰瘡陰蝕。下三蟲。去蛇毒。
- 石長生。一名丹草。味鹹微寒。生山谷。治寒熱惡瘡大熱。辟鬼氣不祥。
- 姑活。一名冬葵子。味甘温。生川澤。治大風邪氣。濕痺寒痛。久服輕身益壽耐老。
- 別羈※。味苦微温。生川谷。治風寒濕痺。身重四肢疼酸。寒邪歷節痛。
- 石下長卿。一名徐長卿。味鹹平。生池澤。治鬼注精物。邪惡氣。殺百精蠱毒。老魅注易。亡走啼哭。悲傷恍惚。
- 翹根。味甘寒。生平澤。下熱氣。益陰精。令人面悅好。明目。久服輕身耐老。
- 屈草。味苦微寒。生川澤。治胸脇下痛。邪氣腸間寒熱。陰痺。久服輕身益氣耐老。
- 淮木。一名百歲城中木。味苦平。生平澤。治久欬上氣。傷中虛羸。女子陰蝕。漏下赤白沃。
- 六畜毛蹄甲。味鹹平。生平谷。治鬼注蠱毒。寒熱驚癇。瘧。癩疾狂走。駱駝毛尤良。躡鼠。墮胎。生乳易。
- 麋脂。一名宮脂。味辛温。生山谷。治癰腫惡瘡。死肌寒風濕痺。四肢拘緩不收。風頭腫氣。通湊理。
- 豚卵。一名豚顛。味甘温。治驚癇癩疾。鬼注蠱毒。除寒熱賁豚。五癰。邪氣攣縮。猪懸蹄。治五痔伏腸。腸癰內蝕。
- 燕矢。味辛平。生平谷。治蠱毒鬼注。逐不祥邪氣。破五癰。利小便。
- 天鼠矢。一名鼠姑。一名石肝。味辛寒。生山谷。治面癰腫。皮膚洗洗時痛。腹中血氣。破寒熱積聚。除驚悸。
- 蝦蟆。味辛寒。生池澤。治邪氣。破癥堅血。癰腫陰瘡。服之不患熱病。
- 石蠶。一名沙蠶。味鹹寒。生池澤。治五癰。破石淋。墮胎。肉。解結氣。利水道。除熱。
- 蛇蛻。一名龍子衣。一名蛇符。一名龍子單衣。一名弓皮。味鹹平。生川谷。治小兒百二十種驚癇。瘰癧癩疾。寒熱腸痔。蟲毒蛇癰。火熬之良。
- 吳公。味辛温。生川谷。治鬼注蠱毒。噉諸蛇蟲魚毒。殺鬼物老精。温瘧。去三蟲。
- 馬陸。一名百足。味辛温。生川谷。治腹中大堅癥。破積聚。息肉惡瘡白禿。
- 蠮螋。味辛平。生川谷。治久聾。欬逆毒氣。出刺出汗。
- 雀甕。一名躁舍。味甘平。生樹枝間。治小兒驚癇。寒熱結氣。蠱毒鬼注。
- 彼子。味甘温。生山谷。治腹中邪氣。去三蟲。蛇螫蠱毒。鬼注伏尸。
- 鼠婦。一名蟠負。一名伊威。味酸温。生平谷。治氣癰不得小便。婦人月閉血瘕。癰瘡寒熱。利水道。
- 螢火。一名夜光。味辛微温。生池澤。明目。小兒火瘡。傷熱氣。蠱毒鬼注。通精神。
- 衣魚。一名白魚。味鹹温。生平澤。治婦人疝瘕。小便不利。小兒中風項強。皆宜摩之。
- 白頸蚯蚓。味鹹寒。生平土。治蛇瘕。去三蟲。伏尸鬼注蠱毒。殺長蟲。仍自化作水。
- 螻蛄。一名惠姑。一名天螻。一名螻。味鹹寒。生平澤。治產難。出肉中刺。潰癰腫。下哽噎。解毒。除惡瘡。夜出者良。
- 蛻螂。一名蛻蛻。味鹹寒。生池澤。治小兒驚癇瘰癧。腹脹寒熱。大人癩疾狂易。火熬之良。
- 螻螋。一名龍尾。味辛寒。生川谷。治寒熱鬼注蠱毒。鼠瘻惡瘡疽蝕。死肌。破石癰。

- 地膽。一名元青。味辛寒。生川谷。治鬼注寒熱。鼠瘻惡瘡。死肌。破癥瘕。墮胎。
- 馬刀。味辛微寒。生池澤。治漏下赤白寒熱。破石淋。殺禽獸。賊鼠。
- 貝子。味鹹平。生池澤。治目翳。鬼注蠱毒。腹痛下血。五癰。利水道。燒用之良。
- 杏核。味甘溫。生川谷。治欬逆上氣。雷鳴喉痺。下氣。產乳金創。寒心賁豚。
- 桃核。味苦平。生川谷。治瘀血血閉癥。邪氣。殺小蟲。桃華。殺注惡鬼。令人好色。桃梟※。殺百鬼精物。桃毛。下血瘕。寒熱積聚。無子。桃蠹。殺鬼。辟不祥。
- 苦瓠。味苦寒。生川澤。治大水面目四肢浮腫。下水。令人吐。
- 水蘄。一名水英。味甘平。生池澤。治女子赤沃。止血養精。保血脉。益氣。令人肥健嗜食。
- 腐婢。味辛平。治痰逆寒熱。邪氣泄利。陰不起。病酒頭痛。